



Republika e Kosovës
Republika Kosova – Republic of Kosovo



Komuna e Mitrovicës së Jugut
Opština Juzna Mitrovica – Municipality of Mitrovica South

KUVENDI I KOMUNËS SË MITROVICËS SË JUGUT

Nr. 02-060/01-0008621-1/26 dt. 17.02.2026

Mitrovicë

PROCESVERBAL

**Nga mbledhja solemne e Kuvendit të Komunës
(Mbledhja e 5-të)**

Koha: 17.02.2025 ora 10:00

Vendi: Salla e mbledhjeve të Kuvendit të Komunës

Të pranishëm: Kryesuesi i Kuvendit z. Safet Kamberi,

Anëtarët e Kuvendit: Shkëlqim Ibrahim, Fisnik Suma, Majlinda Kurti, Igballe Islami, Ferdi Kadriu, Artan Berisha, Egzon Hamza, Gëzim Stavileci, Egzon Sadiku, Valon Brahimi, Liridona Muharremi, Nazmije Sejdiu, Lavdim Zeneli, Armend Begu, Jeton Zeneli, Erseka Barani, Rinesa Preteni, Sazan Ramaxhiku, Bajram Istrefi, Visar Syla, Xhevdet Osmani, Elfate Ademi Bahtiri, Rozana Peci, Oltion Ahmeti, Xhyljeta Imeri, Arta Neziri, Gjergj Beka, Jeton Ujkani dhe Flamur Vojvoda

Kryetari i Komunës z. Faton Peci

Nënkryetari Enis Osmani

Drejtorët e Drejtorive

Përfaqësues të Policisë së Kosovës

Mediat

Mungoi: Kushtrim Zeneli

Mbledhjen e hapi dhe e kryesoi Kryesuesi i Kuvendit z. Safet Kamberi i cili theksoi se në zbatim të nenit 43, paragrafi 1, të Ligjit Nr. 03/L-040 Për vetëqeverisje lokale; nenit 8, paragrafët: 1 dhe 2, të Udhëzimit Administrativ (MAPL) Nr. 02/2015 Për mbajtjen e mbledhjeve të Kuvendit të Komunës; nenit 9, paragrafët: 1 dhe 3, nenit 50, paragrafi 1, nënparagrafi 1.5, dhe nenit 55, të Statutit të Komunës së Mitrovicës; Kryesuesi i Kuvendit të Komunës, në konsultim me Kryetarin e Komunës, për sot ka thirrur mbledhjen solemne:

Kushtuar "17 Shkurtit – Ditës së Pavarësisë së Republikës së Kosovës"

Në vazhdim Kryesuesi i mbledhjes mbajti një fjalë rasti:

Kryesuesi i Kuvendit z. Safet Kamberi: Të nderuar anëtarë të Kuvendit. Të respektuar përfaqësues të institucioneve. Të dashur qytetarë. Sot shënojmë një ditë që nuk

është vetëm një datë në kalendarin tonë shtetëror, por një kujtesë e gjallë e rrugës së gjatë dhe të mundimshme drejt lirisë. Tetëmbëdhjetë vite më parë, Kosova u bë shtet i pavarur, duke kurorëzuar sakrificën dhe përkushtimin e brezave që besuan se liria është një e drejtë që nuk negociohet. Kjo ditë na bashkon të gjithëve. Liria e Kosovës është rezultat i një përpjekjeje të përbashkët: të atyre që rezistuan, të atyre që vepruan me mençuri politike dhe të atyre që sakrifikuuan jetën që ne sot të jetojmë të lirë. Mitrovica ka dhënë shumë për lirinë e Kosovës, si gjatë luftës, ashtu edhe pas saj. Ngjarjet e marsit 2004 dëshmuuan sfidat që ka përballuar, por edhe qëndrueshmërinë e saj. Sot, Mitrovica mbetet simbol i qëndresës dhe i besimit në të ardhmen e Kosovës. Binomi i dy figurave - Presidenti historik Ibrahim Rugova dhe kryekomandanti Adem Jashari - simbolizon shtetin e Kosovës. Rugova përfaqëson vizionin politik dhe përpjekjen e palodhshme për ndërtimin e shtetit dhe për ta bërë Kosovën të dëgjuar e të respektuar ndërkombëtarisht. Adem Jashari përfaqëson Ushtrinë Çlirimtare të Kosovës dhe sakrificën e të gjithë dëshmorëve që dhanë jetën për liri, duke mishëruar qëndresën, guximin dhe vendosmërinë e popullit tonë. Këto dy dimensione - sakrifica dhe vizioni - janë themeli mbi të cilin qëndron liria dhe shtetësia jonë. Të nderuar qytetarë. Sot kujtojmë me respekt të gjithë dëshmorët, invalidët dhe çdo qytetar që kontribuoi në këtë rrugë. Sakrifica e tyre është themeli mbi të cilin qëndron Republika jonë. Obligimi ynë është ta ruajmë këtë trashëgimi duke ndërtuar institucione të drejta dhe një shtet që u shërben qytetarëve me dinjitet. Në këtë përvjetor shprehim solidaritetin dhe mbështetjen tonë morale për ish-krerët e Ushtrisë Çlirimtare të Kosovës që po përballen me proceset gjyqësore në Hagë. Lufta e UÇK-së ishte një luftë çlirimtare, e drejtë për liri dhe dinjitet, dhe besojmë se drejtësia e paanshme do ta konfirmojë këtë të vërtetë. E ardhmja e Kosovës varet nga aftësia jonë për të qëndruar të bashkuar. Më shumë se kurrë kemi nevojë për unitet, përgjegjësi dhe besim në njëri-tjetrin. Vetëm kështu mund të ndërtojmë një shtet më të drejtë, më të zhvilluar dhe më të sigurt për brezat që vijnë. Le të jetë ky përvjetor një moment krenarie, por edhe një zotim i ri që ta ruajmë frymën e bashkimit dhe ta çojmë përpara Republikën tonë me përkushtim dhe vizion, duke mos harruar kurrë çmimin e lirisë. Urime 18-vjetori i Pavarësisë së Republikës së Kosovës! Lavdi të gjithë atyre që sakrifikuuan për lirinë! Zoti e bekoftë Kosovën dhe qytetarët e saj! Faleminderit!

Shkëlqim Ibrahim: Të dashur qytetarë. Sot festojmë me krenari 17 shkurtin, Ditën e Republikës sonë, një nga momentet më të ndritura në historinë e kombit tonë dhe të shtetit tonë modern. Republika e Kosovës është simbol i pavarësisë, sovranitetit kombëtar dhe vullnetit të palëkundur të popullit tonë. Në këtë ditë të madhe kujtojmë me nderim të thellë sakrificën e Familjes Jashari që u bë themel i lirisë sonë. Është detyra jonë të mbrojmë vlerat e Republikës së Kosovës, të forcojmë unitetin tonë dhe të punojmë për një të ardhme më të drejtë, më të sigurt dhe më të begatë. Të çlirohemi kërkon guxim. Ka nënkuptim të përballësh me pasiguri, por me vendosmëri. Ka nënkuptim të besosh në veten tënde edhe kur të tjerët vënë në dyshim zgjedhjet e tua. Çdo arritje e madhe në historinë njerëzore ka nisur me dikë që vendosi të çlirohej nga ajo që e mbante prapa. E tillë ishte edhe përpjekja jonë për liri dhe po ashtu një njeri që guxoi të niste çlirimin. Çlirimi kulmoi me pavarësi. Kjo arritje i përket çdo qytetari që ëndërroi lirinë. I përket mësuesve që edukuan në vështirësi breza, profesorëve që mbajtën gjallë gjuhën dhe kulturën tonë, mjekëve dhe mantelbardhëve që sakrifikuuan shumë, bujqve që ushqyen luftëtarët e UÇK-së, prindërve tanë që rritën fëmijët e tyre me besimin në një të nesërme më të mirë dhe kështu secili prej jush ka luajtur një rol në sjelljen tonë në këtë moment historik. Po ashtu, nuk mund te

flasim për rrugëtimin drejt pavarësisë pa përmendur figurat kryesore politike dhe udhëheqësit që bartën përgjegjësi në momentet vendimtare të shtetformimit dhe që ishin në piedestalet më të larta të përpjekjes për liri, drejtorin politik të Ushtrisë Çlirimtare të Kosovës dhe njëherazi Shpallësi i Pavarësisë së Republikës së Kosovës Presidenti z. Hashim Thaçit dhe shokët e tij kryetari Kadri Veseli, z. Jakup Krasniqi dhe z. Rexhep Selimi të cilët ishin bartës të proceseve historike që quan në shpalljen e pavarësisë dhe në konsolidimin e institucioneve të Republikës së Kosovës, ndërsa sot po përballen me padrejtësi politike në Hagë. Një gjyq politik, i stërbushur me dëshmi nga agresori serb, ka sulmuar dhe tentuar të njollojë luftën e drejtë dhe përpjekjet për liri. Hashim Thaçi, Kadri Veseli, Jakup Krasniqi dhe Rexhep Selimi janë sinonim i guximit, që refuzuan të përulen para shtypjes, siç bëri Ushtria Çlirimtare e Kosovës dhe populli ynë. Ata zgjodhën të ngrihen dikur për të qëndruar sot, të flasin dikur për të dëshmuar sot, të luftojnë për atë që besonin dhe që ishte e drejtë, për të vendosur sot edhe njëherë për pastërtinë dhe të drejtën e luftës. Shumëkush tha se kjo ditë nuk do të vinte kurrë. Thanë se ishim shumë të pakët, të përçarë për të qeverisur veten. Por ata nuk e kuptuan fuqinë e unitetit, forcën e qëllimit të përbashkët dhe thellësinë e vendosmërisë sonë. Ne ua dëshmuam të kundërtën me këmbëngulje, me bashkim dhe me besim të palëkundur në kauzën tonë. Në këtë 17 Shkurt, le të jemi të bashkuar rreth vlerave të lirisë, demokracisë dhe drejtësisë. Le ta konfirmojmë përkushtimin tonë ndaj Republikës sonë, ndaj sakrificës së atyre që dhanë gjithçka dhe ndaj përgjegjësisë që kemi për brezat që do të vijnë. Urime 17 Shkurti, Dita e Pavarësisë! Zoti e bekoftë Kosovën!

Sazan Ramaxhiku: Jemi mbledhur në këtë seancë për ta kujtuar dhe nderuar një nga datat më të mëdha të historisë sonë, një nga ditët më të merituar për liri e pavarësi. Prandaj, me respekt të thellë përkulemi para dëshmorëve, të cilët në momentet më të vështira morën mbi supe barrën e lirisë në të gjitha luftërat që kaloi populli shqiptar, luftëra të cilat ishin për dinjtet dhe për të drejtën tonë për shtet. Ideja për vetëvendosje daton që nga përpjekjet e para kombëtare për liri, nga kryengritjet dhe organizimet politike, nga programet e rilindësve tanë dhe nga çdo formë rezistence kundër pushtimit dhe mohimit të të drejtave kombëtare. Në çdo etapë të rrugëtimin tonë – nga rezistenca paqësore, te lufta çlirimtare dhe deri te shtetndërtimi – kjo ide ka qenë boshti i aspiratës sonë për liri dhe sovranitet. Andaj, në ditë të veçanta, në ditë të mëdha, është e pamundur të mos kthejmë kokën mbrapa. 17 Shkurti është kurorëzimi – por rruga drejt tij ka qenë e gjatë, e mundimshme dhe e dhimbshme. E kujtojmë qëndresën kundër perandorëve dhe pushtuesve. E kujtojmë luftën kundër xhonturqve dhe çlirimin e Shkupit. E kujtojmë Hasan Prishtinën, që zgjodhi kryengritjen para kolltukëve. E kujtojmë Isa Boletini, i cili që nga mosha 16-vjeçare nuk e ndali pushkën dhe dha gjithçka për liri e Shqipëri. E kujtojmë pushtimin e parë (1912), të dytin (1918) dhe të tretin (1945). Lumenjtë e gjakut nga gjcnocidet – por shpirtin shqiptar që kurrë nuk u nënshtrua. Kujtojmë ilegalitetin, rezistencën paqësore, demonstratat dhe aksionet e para të Ushtrisë Çlirimtare të Kosovës. Kujtojmë sakrificën e komandantit Adem Jashari me tërë familjen – një rast unik në historinë botërore. Gjakun e dëshmorëve. Luftën heroike të trimave tanë, sidomos nga Zona Operative e Shalës së Bajgorës. Sot, mbi të gjitha, ne besojmë se e vërteta do të triumfojë. Besojmë se drejtësia nuk mund ta zhbëjë karakterin çlirimtar të luftës sonë dhe se në fund do të konfirmohet ajo që populli ynë e di: se sakrifica për liri ishte e drejtë dhe e pastër. Në këtë frymë, edhe Lëvizja Vetëvendosje ka dhënë kontributin e saj politik e institucional, duke ngritur zërin për sovranitet, për mbrojtje të interesit publik dhe kundër kompromiseve të dëmshme. Sot kemi ushtrinë tonë,

shtetin tonë, Kosova e lirë. Por bashkë me lirinë kemi edhe përgjegjësi: përgjegjësi për ta forcuar ekonominë, për ta ngritur drejtësinë dhe për ta mbrojtur sovranitetin cep më cep. Sepse liria nuk është vetëm trashëgimi – është amanet. Amanet që ta ruajmë me punë, me ndershmëri dhe me unitet. Amanet që sot po e shohim të materializuar edhe në veriun e vendit, ku simbolet e Republikës respektohen dhe rendi kushtetues shtrihet në çdo cep të territorit. Amanet që na e rikujtoi me gjakun e tij edhe rënia heroike e rreshterit Afrim Bunjaku, i cili në sulmin terrorist në Banjskë dëshmoi se sovraniteti nuk është fjalë – por sakrificë. Amanet që fëmijët tanë ta jetojnë Kosovën më të fortë, më të drejtë dhe më të zhvilluar se ne sot. Le të jemi brezi që sakrificën e shndërron në zhvillim, gjakun në shtetndërtim dhe dhimbjen në forcë. Le të jemi brezi që e mban lart flamurin e përgjegjësisë, ashtu siç e mbajtën ata flamurin e lirisë. Republika jonë do të jetojë përjetësisht – sepse është ndërtuar mbi sakrificë dhe mbi besim në liri. Gëzuar Mitrovicë! Gëzuar Kosovë!

Visar Syla: I nderuar Kryetar. I nderuar Nënkryetar. I nderuar Kryesues. Të nderuar asamblistë/e. Të nderuar përfaqësues të institucioneve. Të nderuar përfaqësues të mediave. Të nderuar bashkëqytetarë. Sot është dita kur u vulos sakrifica e brezave dhe u jetësua ëndrra shekullore për liri. Më 17 Shkurt 2008, në Kosovë, u shpall pavarësia, si amanet i të rënëve dhe si përgjegjësi për ne që jetojmë sot. Kjo ditë lidhet fort me 28 Nëntorin e Shqipërisë, kur në vitin 1912 u ngrit flamuri i lirisë në Vlorë nga Ismail Qemali. Aty nisi udha e shtetësisë sonë; këtu, në Kosovë, ajo u përmbush me gjakun dhe qëndresën e popullit tonë. Ne nuk e fituam lirinë dhuratë. Ajo erdhi pas dekadash përpjekjeje, pas sakrificës së mijëra dëshmorëve dhe pas luftës çlirimtare të udhëhequr nga Ushtria Çlirimtare e Kosovës. Emrat e heronjve tanë, si Adem Jashari, janë gurë themeli të këtij shteti, simbol i guximit, i flijimit dhe i krenarisë kombëtare. Sot, kur festojmë pavarësinë, ne nuk festojmë vetëm një akt politik. Ne festojmë identitetin, gjuhën, flamurin, kulturën dhe të drejtën për të vendosur vetë për fatin tonë. Por liria nuk është vetëm e drejtë, është edhe detyrë. Detyrë për ta ndërtuar Kosovën me drejtësi, me zhvillim, me unitet dhe me besim në të ardhmen. Le ta mbajmë gjallë frymën e 28 Nëntorit dhe të 17 Shkurtit në çdo veprim tonin. Le të jemi të bashkuar përtej dallimeve, sepse vetëm të bashkuar jemi të pathyeshëm. Rroftë Kosova e pavarur! Rroftë kombi shqiptar!

Gjergj Beka: I nderuar Kryesues. I nderuar Kryetar. Të nderuar Kolcë. Të nderuar mysafirë. Të nderuar të pranishëm. Të dashur qytetarë. Sot, në 18-vjetorin e Pavarësisë së Kosovës, qëndrojmë krenarë përpara historisë sonë. Tetëmbëdhjetë vite më parë, më 17 shkurt 2008, në Prishtinë u vulos ëndrra shekullore e popullit tonë për liri dhe shtetësi. Kjo ditë nuk erdhi lehtë. Ajo është fryt i sakrificës së brezave të tërë. Me respekt të thellë kujtojmë Presidentin historik Ibrahim Rugovë, i cili me urtësi dhe vizion e mbajti gjallë kauzën e Kosovës në arenën ndërkombëtare. Me nderim të përjetshëm kujtojmë familjen heroike Adem Jashari dhe gjithë familjen Jashari, simbol të qëndresës dhe sakrificës sonë kombëtare. Kujtojmë të gjithë dëshmorët dhe të rënë për liri, të cilët me gjakun e tyre shkruan historinë e shtetit tonë. Një kapitull i veçantë i kësaj historie i takon Ushtrisë Çlirimtare të Kosovës dhe drejtuesve të saj. Sot, në këtë përvjetor, nuk mund të mos përmendim krerët e UÇK-së që po përballen me procese gjyqësore në Hagë: Hashim Thaçi, Kadri Veseli, Jakup Krasniqi dhe Rexhep Selimi. Pavarësisht zhvillimeve dhe proceseve që po zhvillohen, historia e luftës për liri dhe roli i tyre në atë periudhë mbeten pjesë e pandashme e rrugëtimit tonë drejt shtetit. Lufta e UÇK-së ishte thirrje për liri, për dinjitet dhe për të drejtën për të jetuar të barabartë në tokën tonë. Në mënyrë të veçantë, sot

kujtojmë rolin e Hashim Thaçit si një ndër figurat kyçe të procesit politik që çoi në shpalljen e Pavarësisë. Si Kryeministër i Kosovës në atë kohë, ai ishte zëri që lexoi Deklaratën e Pavarësisë, duke e bërë realitet ëndërrën e shumë brezave. Ajo ditë shënoi jo vetëm lindjen e një shteti të ri, por edhe kurorëzimin e një sakrifice të gjatë kombëtare. 18 vite shtet janë 18 vite përgjegjësi. Pavarësia nuk është vetëm një datë në kalendar; ajo është përkushtim i përditshëm për ta forcuar shtetin tonë, për ta zhvilluar ekonominë, për ta fuqizuar drejtësinë dhe për ta ruajtur unitetin tonë kombëtar. Sot, më shumë se kurrë, duhet të qëndrojmë të bashkuar. Të nderojmë të kaluarën tonë, të respektojmë sakrificën dhe të ndërtojmë me mençuri të ardhmen. Le ta ruajmë Kosovën si amanet të dëshmorëve dhe si shpresë për fëmijët tanë. Urime 18-vjetori i Pavarësisë, Kosovë! Qofsh gjithmonë e lirë, e pavarur dhe krenare!

Flamur Vojvoda: I nderuar Kryesues i Kuvendit Komunal. I nderuar Kryetar i Komunës. Të nderuar asamblistë, përfaqësues të institucioneve, familje të dëshmorëve, veterane të luftës dhe qytetarë të respektuar. Sot jemi mbledhur për të shënuar me krenari dhe dinjitet përvjetorin e Pavarësisë së Kosova, një datë që përfaqëson realizimin e një ëndërrë shekullore të popullit tonë për liri, shtetësi dhe dinjitet. Pavarësia e Kosovës, e shpallur më 17 shkurt 2008, është fryt i sakrificës së brezave të tërë, i përpjekjeve të pandalshme politike e diplomatike, por mbi të gjitha i gjakut të derdhur për liri. Në themel të shtetit tonë qëndron lufta e drejtë dhe çlirimtare e Ushtria Çlirimtare e Kosovës, e cila u bë zëri dhe arma e një populli që kërkonte të jetonte i lirë në tokën e vet. Sot përkulemi me respekt të thellë para Familjes Heroike të Komandantit legjendar, Adem Jashari, dëshmorëve të kombit, invalidëve dhe veteranëve të luftës. Sakrifika e tyre është themeli mbi të cilin qëndron Republika jonë. Lufta e UÇK-së ishte një luftë për mbijetesë, për dinjitet njerëzor dhe për të drejtën për të qenë të barabartë mes kombeve të lira të botës. Sot jemi dëshmitarë të një procesi gjyqësor që po zhvillohet në Hagë kundër disa prej themeluesve të Ushtrisë Çlirimtare të Kosovës. Ne besojmë fuqishëm në pafajësinë e tyre dhe në drejtësinë e luftës së bijve dhe bijave të UÇK-së - një luftë për liri, dinjitet dhe të drejta themelore. Thirrja për drejtësi sot është zëri i një populli që qëndron me bindje në anën e së vërtetës, që beson në vlerat evropiane, në sundimin e ligjit dhe në drejtësinë e paanshme. Është një thirrje për dinjitet kombëtar, për respekt ndaj sakrificës dhe për triumfin e së drejtës mbi çdo paragjykim. Si përfaqësues të qytetarëve në këtë asamblë, kemi përgjegjësi të veçantë ta ruajmë frymën e unitetit dhe ta forcojmë besimin e qytetarëve në institucionet tona. Pavarësia e Kosovës është projekt i përbashkët mbi dallimet politike, mbi interesat personale dhe mbi çdo ndarje. Në këtë përvjetor, le ta kujtojmë të kaluarën me krenari, ta jetojmë të tashmen me përgjegjësi dhe ta ndërtojmë të ardhmen me besim, duke punuar çdo ditë për një Kosovë më të drejtë, më të zhvilluar dhe më të fortë. Lavdi të rënëve për liri! Nderim i përjetshëm për sakrificën e tyre! Urime përvjetori i Pavarësisë së Kosovës!

Kryetari Faton Peci: Të nderuar. Jemi mbledhur sot këtu, në këtë seancë solomne, si përfaqësues të qytetarëve, për të shënuar Ditën e Pavarësisë. Kjo datë me rëndësi historike është sublimim i sakrificës gjithpopullore ndër shekuj. Shqiptarët në këto treva janë popull autokton që gjithë jetën e tyre janë angazhuar dhe kanë luftuar për lirinë e popullit të vet. Asnjëherë aspirata jonë nuk ka qenë pushtuese; luftërat ndër shekuj kanë qenë vetëm për të jetuar të lirë dhe me dinjitet. Betejat e pushtuesve kanë qenë interesa për pasuri mbitokësore dhe nëntokësore, ambicie për gllabërim të territoreve, të cilat ndër shekuj janë përballur me guximin dhe trimërinë e shumë grave dhe burrave atdhetarë dhe

patriotë, që kanë dhënë gjithçka nga jeta e tyre që ne sot të jetojmë të lirë. Mitrovica, në aspektin gjeopolitik e gjeostrategjik, ka qenë, është dhe do të mbetet qyteti me peshën më të madhe politike. Këtu vendoset çdoherë për të ardhmen e shqiptarëve, përtej rëndësisë edhe të Republikës. Mjafton të kthehemi në retrospektivë dhe të kujtojmë eksodin e shpërnguljes së 700 fshatrave shqiptarë dhe ndryshimin e realitetit faktik, ku prezencja më domethënëse e shqiptarëve mbetet në Mitrovicë dhe një pjesë me dominancë në veri. Të kujtojmë se për lirinë e këtij trualli, Mitrovica ishte larë e tëra me gjak në vitin 1903, kur me qindra burra, shumica e të cilëve ishin nga ky qytet. Sepse Mitrovica ishte e rëndësishme strategjike, kur interesat ndaheshin edhe në mes të Perandorisë Osmane dhe Rusisë cariste. Beteja për pavarësinë e shqiptarëve kishte filluar nga kryengritjet në Kosovë, me protagonistin kryesor në aspektin ushtarak, heroin Isa Boletini, dhe vazhduan deri në vitin 2023, me heroin e fundit të Kosovës, heroin Afrim Bunjaku. Kosova e vuajtur, pas dy luftërave botërore dhe e mbetur pa vullnetin e qytetarëve që kërkonin vetëvendosje, mbeti jashtë shtetit shqiptar, brenda krijesës së quajtur Jugosllavi, ku trajtimi ynë ishte në një kategori tjetër. Përkundër avancimeve që kishin ndodhur në vitet '70, në aspektin arsimor, por edhe ekonomik, nefsi i shqiptarit patriot kërkonte liri të plotë. Ato filluan përmes demonstratave për afër dy dekada. E kur bota po ndryshonte, muri i Berlinit ra, kjo pjesë e Evropës kishte në krye të Jugosllavisë kasapin e Ballkanit, që synonte vrasje, spastrim etnik, e realizoi gjenocid në Bosnje e Kosovë. Neve, si popull, Zoti i madh na bekoji me një Ibrahim Rugovë. Ai arriti që në historinë e shqiptarëve të bëjë bashkë një popull të tërë. Ishte një lëvizje gjithpopullore që afirmonte liritë njerëzore, që sensibilizoi të drejtat e një populli për vetëvendosje në çdo kancelari të botës demokratike e perëndimore. Sa më shumë që kishte rezistencë, aq më shumë rritej presioni e terrori mbi një popull civil të pambrojtur. Rrjedhat politike çuan në drejtim që çdo ditë e më shumë ishte pothuajse e pamundur të evitohet rezistenca e armatosur. Si e tillë, ajo kulmoi me një familje e cila u flijua pothuajse e tëra për Kosovën; ajo kishte protagonist Adem Jasharin dhe rezistencën e flijimitin e paparë ndonjëherë në histori, jo vetëm të kombit shqiptar. Kjo rënie e ky frymëzim bëri që të rinj e të reja dhe një popull i tërë të rreshtohen në organizimin e rezistencës dhe luftës çlirimtare. Sot, nën dritën e kësaj dite historike, Kosova feston me krenari si shtet i lirë dhe sovran, i ndërtuar mbi sakrificën dhe përkushtimin e brezave. Sovraniteti ynë është simbol i qëndresës, i gjakut të dëshmorëve dhe i ëndrrës shekullore për liri.

Kryesuesi mbylli mbledhjen solemne të Kuvendit të Komunës.

Mbledhja përfundoi punimet në ora 10:55 min.

Mitrovicë

Procesmbajtës:


Afërdita MAXHUNI

Kryesuesi i mbledhjes


Safet KAMBERI

